

師古曰為西南夷君長以百入○宋祁曰百入越獨夜

郎滇受王印滇小邑也最寵焉後二十三歲孝昭始元

元年益州廉頭姑繒民反殺長吏牂柯談指同並等二

十四邑凡三萬餘人皆反師古曰並音伴遣水衡都尉發蜀郡

犍為犇命萬餘人師古曰犇古奔字擊牂柯大破之後

三歲姑繒葉榆復反遣水衡都尉呂辟胡將郡兵擊之

師古曰辟音璧辟胡不進蠻夷遂殺益州太守乘勝與辟胡戰

士戰及溺死者四千餘人明年復遣軍正王平與大鴻

臚田廣明等並進大破益州斬首捕虜五萬餘級獲畜

產十餘萬上曰鉤町侯亡波率其邑君長人民擊反者